

朱九江先生集

一函
四册



朱九江先生集卷八

文

南海九江朱氏家譜序

譜牒之學史學也周官奠繫世辨昭穆掌於小史史記紀五帝
汜夏殷周秦並詳其子孫氏姓而世本一書漢志隸春秋家蓋
先王譜學之設實與宗法相維而表裏乎國史宗法立而士大
夫家收族合食至於百世不遷而奠其繫世辨其昭穆朝廷且
爲之庀官司藏冊府是故黃農虞夏之胄閱數千祀而可知也
世祿廢宗法亡譜學乃曠絕不可攷漢興天子奮於草茅將相
出於屠牧率罔知本系所由來魏晉至唐仕宦重門閥百家之
譜上於吏部維時官之選舉必稽簿狀家之昏姻必等門第而

譜學復興歐陽氏脩唐書有宰相世系之表隱示國史家牒相
爲表裏且謂世族之盛諸臣克脩家法致然跡其編纂論述若
勗前史所無然通人碩儒咸許其湛深古誼能探先王制作精
意蓋勗而實因也五季喪亂圖牒盡湮一二儒生乃欲掇拾補
苴冀存古宗法一綫及夸者爲之扳附華腴虛張勳伐或至不
可究詰譜錄一家遂爲識者厭薄而去史益遠矣吾族之有譜
也自明萬厯丁丑文學公學懋始也文學遡始祖勵七世當是
時也子姓服屬未遠恩義絲結風氣醇龐其仕者精白一心以
從王事而不有其家其父老教讓教謙敦長者之行其子弟以
讀以耕鮮諛誕之失卽一二宦裔貴游徙宅省垣號稱豪宕然
日散千金親故多待以舉火一時數搢紳家法以吾族爲優微

特家棄之先立也厥後一脩於處士公昌瑤在

國朝康熙丙申康熙以來無踵事者道光丁未次琦歸自京師之官山右父老祖予酒次及之異聲同歎咸豐初元亟加討論以寇亂中輟亂已次琦亦假還共申前議於是宗人朝議大夫奎元兄弟慨然願任脯糒劓劓之費乃會推吾弟明經宗琦主橐而宗人上舍士仁士報景熙佐之次琦不揣禱昧斟酌今古成序例一篇授以從事是役也寘局於己未之春斷限於辛酉之臘以今年正月鐫竣刊易再三編摩况瘁歷十一寒暑而書成實費白金二千三百兩有奇夫然後十有二卷之書繫世之源流昭穆之近遠恩榮之覃被祠廟之宗禮墳瘞之阡原菽文之津逮嫩惡之登削遺軼之甄尋直而不汗信而有徵不侈前

人勿廢後觀敢云美備要其規模亦略具矣次琦行四方久竊
慨風俗日益以敝而親情日益衰不啻漢史所稱斗粟尺布而
骨肉不相容者朝議兄弟獨能推鉅貲不色吝近又增寘祠嘗
捐白金三千兩而宗人翰林待詔銜國恩亦捐千兩其諸義重
千鈞利輕一羽者與於以見吾先人之遺澤長也詩不云乎戚
戚兄弟莫遠具邇又曰豈無它人不如我同姓自茲以往願我
族眾咸喻於古者宗譜相維遺意而使內外有別長幼親疏有
序有無相調吉凶患難相恤賸臘祭饗飲食相周旋毋以財失
義毋以忿廢親則吾家世德作求安見不如浦江鄭氏江州陳
氏諸義門書之國史以爲美譚者宰相世系表序曰門祚之盛
衰雖視功德厚薄亦在其子孫烏虜可不勸哉可不勸哉

京藏 南海九江朱氏家譜序例

古者譜系之書天子曰帝繫諸侯曰世本周禮小史疏而通上下而

言均謂之譜桓譚謂太史公作世表竝倣周譜是也梁書劉魏

晉代降初曰某氏譜世說劉孝標注引王氏謝氏吳氏孔氏諸

條稱王氏家譜紀尚後曰某氏家譜隋書經籍志有楊氏家譜

書的疑家字為羨文唐書藝文志有謝氏呂氏

等家又有別撰稱名者如摯氏世本世說裴氏家牒裴守劉氏

家史劉子范陽家志之類盧藏用撰以文心雕龍曰譜者普也

注序世統事資周普則譜迺紀世之正名古所命也故不從其

異也繫以其地稱南海九江志別也有同姓而異望同壤而異

族者也趙郡東祖李氏家譜唐志四明槎湖張氏族譜國史經籍志是

其例也右序名譜之例

譜以合宗且有世系支派然後諸譜中諱字有可稽昭穆有可

考故首列宗支譜鄭漁仲謂三代之後氏族合而為一則以地

望明貴賤使貴有常尊賤有等威通志氏族略氏漢有鄧氏官譜隋志唐

有衣冠譜又有官族傳唐志氏族書第門閥有自來矣故恩榮譜

次之譜所以明藝文作一本之思也故祠宇譜墳塋譜次之譜

所以守文獻備一家之故也故藝文譜家傳譜次之其餘遺聞

逸事不列於諸譜者散碎爬羅亦述家風脩世錄者所不廢潘岳

有述家風詩明故以雜錄譜終之也右序分編之例

古人自序如屈子離騷馬班二史固不上溯姓原譜牒亦然見漢

書揚雄傳注引揚雄自敘唐書宰相世系表廬陵歐陽氏譜老

泉蘇氏譜竝沿其例迺古法也宋朱長文朱氏世譜絳雲樓書目述古堂

書目明朱右邾子世家明史藝文志今固未見然姓族源流不可不考

也近時諸城劉氏譜景城紀氏譜均譜必有圖旁行邪上周譜

例也劉杏傳後漢書盧植傳所謂同宗相後披圖按牒以次可知

也通志略有錢氏慶系譜復有錢氏慶系圖國史經籍志有仙

甫自作歸氏世譜亦無圖非是圖必分房唐書世系表例也始祖下定著三房

不曰門通志略有崔不曰派絳雲樓書目有吳不曰眷不曰枝

唐表裴氏分西眷中眷東眷陸氏僻也故仍稱顛觀房存著房

分魚圻枝丹徒枝太尉枝侍郎枝繹思房也圖以四世為一部服窮於四世也膠州法坤宏撰法氏譜以四世為一

部謂服窮於四世格盡別起者重書一世明有所承也歐陽氏譜詢書第一譜之末又

書第二圖皆書名臨文不諱也蘇氏譜於祖父之名加諱字歐

陽氏譜從其同譜者今從歐譜一族之公非一人之私也名記

原名更名一名別微使後有考也

唐書世系表宗室表械初名

氏表遂一名從鄭氏表玘一名綺

名闕者唐表易稱某

宗室表富陽令某柳氏表某朔方營田副使

今代以方空古義也逸周書穆天子傳闕字代以方空也名後

書字與爵古譜類然也

見世說注引諸家譜

雖別字亦載也

見後漢書虞詡傳注無

爵者魏氏譜稱處士

世說注引魏氏譜曰顛字長齊祖允處士又引陸士衡薦戴若思表曰伏見處士沛

國戴淵盜賊亦稱處士不可從

今不從惡飾也漢代碑陰民與處士別也蘇氏

譜注不仕今不注無庸注也妻前後娶必書妾亦書正家也庶

子不書所生母統於嫡也異出之子不分書統於父也

景城紀氏譜之

例立繼者所生所後必互書責為人後且不替本生也

湯敬升族譜議

之居址必書聚族也

唐表居成紀居解縣洗馬川之例

僑它境必書重出疆也

唐表徙河中徙聞喜之例

異姓抱養削不書干犯刑辟削不書棄親出家削

不書防亂宗也

膠州法氏譜之例

若夫支派失傳者附書荀氏家傳例

也

世說注引荀氏家傳曰巨伯漢桓帝時人也亦出潁川未詳其始末

故登閣嘴房列於譜也後

裔無考者附書七房鄭氏表例也

唐表七房鄭氏大房白麟後絕第二房叔夜後無聞故

世絕無屬列於譜也附居址圖從類也

右序宗支譜之例

唐許敬宗李義府等奏請刪定氏族志以仕唐官五品以上皆

升士流於是兵卒以軍功進者亦得人搢紳嗤之號為勳格

唐書

許敬宗以貞觀所定氏族志不載武后本是知氏族重清門不

徒侈膏梁華腴也

郡姓中三世有三公者曰膏梁有合僕者曰華腴見唐書

然世說注歷引

諸家譜凡著錄之人靡不詳其起家歷官者即舉孝廉不行亦

具於牒

王倫一條注引王氏家譜曰倫字太沖司空穆侯中子司徒渾弟也年二十餘舉孝廉不行

而唐史

括氏族書為世系表則凡中外顯僚降至簿尉執仗挽郎無弗

具載其階資則自孝廉有道及第明經以逮陪位出身吏部常
選兵部常選胥錄焉可知有一官者無弗書官有一資者無弗
書資正古法也故都錄之為恩榮譜也若夫制詔璽書古錫命
體也旌節孝旌耆壽古表宅制也是恩榮之鉅者故以起訖斯
篇也

右序恩榮譜之例

世守祠墓孝子孝孫之心也然晉博士傅純議曰冢楸以藏形
而事之以凶廟祧以安神而奉之以吉送形而往迎精而還此
廟墓之大分形神之異制祭者求神之道至多而獨不祭墓

晉書

東海王越傳固知祠墓有先後也朱子家禮謂古之廟制不見於經

且今士庶之賤亦有所不得為者當先立祠堂今考祠堂之稱

名義最古

王逸序楚辭天問篇云屈原見楚先王之廟及公卿祠堂畫天地山川神靈奇詭之狀因書而呵問之據

此則祠堂蓋起於周代我家祖祠建於明嘉靖時當夏言奏請士庶得通

祀始祖之後見王圻續文獻通考蓋非直無借古經正善承朝廷德意為

之江陰楊尚書名時曰祀始祖則族有所統足與譜系相維然

則祠廟譜系義相成也附以坊表第宅園亭樓閣之屬禮營宮

室宗廟為先居室為後序也右序祠宇譜之例

記云大夫士去國曰奈何去墳墓宗子出疆則庶子望墓而祭

古人重墓故墓亦載於譜隋志有楊氏家譜狀并墓記一卷譜元戴表亦有小方門戴氏居葬記

塋墓非規也紀氏譜竝仿金石例為圖潘昂霄金石例引古金石例云墓圖作方石碑

先畫墓圖有作員象者內畫墓樣各標其穴某人其石嵌之祭堂壁上無祭堂則嵌於圍牆上今不從族蕃不

勝圖也圖以嵌諸墓非以撫諸譜也譜墓用羅經甲乙分正隅

非徇形家言辨方也子謂防墓不可以不識辨方所以識也右序

墳塋譜
之例

裴氏家傳曰榮字榮期河東人撰語林數卷號曰裴子世說是

為家牒詳著述之始今載著述區分四部存佚俱收隋唐二志

例也隋志注亡篇唐志不復識別明焦竑志國史經籍從唐書

注者紀其實不注者昭其慎也今亦不復注也標目後揭原書

序跋文獻通考例也或附隲評亦通考例通考又本之晁氏郡

齋讀書志陳氏直齋書錄解題也右序藝文譜之例

有家譜有家傳魏晉間各自為書世說注有李氏譜又有李氏家傳有袁氏譜又有袁氏家

傳有王氏譜又有王氏世家傳隋唐兩志家傳入然唐志譜系

傳記家譜入譜系惟舊唐書經籍志合為一類

類有官族傳有孔子系葉傳則傳亦譜也傳稱世傳按世為傳
據范汪范氏世傳文也序述之文歐陽氏蘇氏皆名蘇氏乃至

名祖父族譜後錄稱吾祖杲吾父序今不從惡斥也禮子孫得稱祖父字也

儀禮祔祭之祝曰適爾皇祖某甫以儕附爾孫某甫是也又周公稱

其祖曰王季屈原稱其考曰伯庸曰某公據白香山家狀柳子厚叔父墓版文

也其無官者亦稱公據吳仲山碑文也漢故民吳仲山碑稱吳公仲山洪适謂故民者

物故之民也見隸釋婦必繫某公配妻以夫為綱即以夫為名也傳稱武

王邑姜史稱周公阿杜是也左傳昭元年當武王邑姜方震大叔南齊書周盤龍傳盤龍愛妾杜

氏上送金釵鐏二十枚手救曰餉周公阿杜歐陽氏譜亦曰睦夫人欽夫人也有封

者稱封無封者通曰安人從時稱亦沿語類稱夫人例也朱子語類

無爵者曰府君夫人漢人碑已有只是尊神之辭曰原配據晉書禮志文也禮志前妻曰原配

曰繼配據王介甫葛源墓志文介甫又據儀禮也儀禮喪服傳繼母之配父

不曰繼室古之繼室非妻也說詳左傳隱元年杜氏注及孔氏正義不曰中娶中娶

見世說注次配見韓文昭武引溫氏譜將軍李公墓志不曰次配皆僻也婦詳祖父族里

竝及親串世說注引諸姓譜類然碩人首章之義也傳中年壽

可考必書卒年可考必書史家例亦譜系法也世說注引周氏譜曰翼年六十

四卒三國志管甯傳注引先賢行狀曰王烈以建安二十三年寢疾而終女可紀者未嫁已嫁內外

得並書唐志王方慶王氏女記例也在室者章女美出適者為

家榮也傳中事行要在不誣湯氏所謂弗錄有善錄而冒皆不

敢也族譜傳末必注所據書示信也遠法歐氏百越先賢志近

本阮氏右序家傳國史儒林傳彙也譜之例

錢易記吳越世家事蹟撰錢氏家話一卷通志藝文略胡元吉記其

家世遺事著桐陰舊話十卷國史經籍志所謂數典不忘也或資誦

法或系掌故或備譚諧括之曰雜錄以唐志孔至姓氏雜錄名

之也

右序雜錄
譜之例

歐蘇二譜以其所及知者列為譜圖其疏遠者不紀蘇氏止錄本支四世而合族人各自為譜謂各詳其宗合之則至於無窮夫惟族人不知為譜故仁人孝子慨然思作譜以合之而又合其自為族不仍歸於散乎

歸氏有光謂為譜者載其族之世次名諱其所不可知者無如何其可知者無不載也王氏元啟曰既舉族而謀之為之譜以合之大體自當畢載無間於遠近親疏

今不從存收族之遺也

史兼勸懲美惡竝書譜言勸不言懲故稱美不稱惡春秋為親者諱厚之至也唐表於張氏上官氏世系美惡不諱

張氏世系稱通儒仕

安祿山上官氏世系稱漢右將軍安陽侯桀生安車騎將軍桑樂侯以反伏誅今不從不欲以先人媿

子孫也婦改適舊譜皆書庶氏之母孔門不諱經義也晉王氏

譜竝離昏不諱也

世說注引王氏譜曰獻之娶高平郗曇女名道茂後離昏

今不從隱夫凱

風孝子抱無言之恫者也

儒者泥於古經動謂大宗無子則立後小宗無子則不立後無

後者古有從祖耐食之禮

明儒田汝成羅虞臣柴紹炳汪琬徐乾學俱據此立論

新

會湯氏高安朱氏之為譜且斷斷爭之以謂夫人皆為立後不

協於古

湯敬升族譜議朱軾族譜解惑

是惡知古者大宗諸侯世國卿大夫世

祿宗人莫不恃以收族合食是以百世不遷今則井田世祿之

制絕而宗法廢人人可以為卿大夫則人人可以為別子之祖

禮記大傳別子為祖繼別為宗注別子謂公子若始來在此國

者後世以為祖也繼別謂別子之世適也族人尊之謂之大宗

陳氏祥道曰諸侯之適子孫則繼世為君而支子之為卿大夫

者謂之別子有自它國而來於此者亦謂之別子有起自庶

而致位卿大夫亦從別子之義此三者各立宗而為大宗所謂

繼別者也陳氏濂曰別子有三一是諸侯適子之弟別於正室

一是異姓公子來自它國別於本國不來者二是庶姓之起於是邦爲卿大夫而別於不仕者皆稱別子也爲祖者別與後世爲始別子未必非支庶也而謂支庶不立後可乎而况小宗乎宗法既廢所謂世適而號爲宗子者或貧且賤無廟與祭彼小宗支庶之無後者祔於何所食於何人何以使之有所歸而不爲厲乎金匱秦尚書蕙田著論非之是也詳見五禮通考今不從禮貴從宜亦以義起也

自廬陵歐陽氏爲譜本出於渤海而必兼載千桑之族眉山蘇氏本出於眉州刺史味道而必兼載趙郡扶風河南河內之蘇爾後爲譜者往往兼及它郡之賢以著族姓人才之盛歸氏有光爲夏氏世譜黃氏宗義爲黃氏世錄則雖其並時而異派者亦列之歸熙甫爲夏太常祖作世譜錄夏元吉湘陰人輔相五朝蓋與太常並時而異派者黃黎洲自爲世錄雜記先

世行事之可考者及它處黃氏之賢者如石齋黃其尤異者馮道周漳浦人與其父御史尊素並時亦載於錄

氏元颺為馮氏譜四篇其第三篇臚列異姓戚邨諸顯人以表門閥今皆不從惡扳附之嫌也

朱子注論語孟子正文遇國諱則缺筆而不改字注則無弗避

者其注易亦然錢氏十駕齋養新錄云見趙順孫四書纂疏及吳革所刊易本義班班可考洪氏隸

釋謂漢人作文不避國諱樊毅碑命守斯邦劉熊碑來臻我邦

之類未嘗為高祖諱也石經邦君為兩君之好與何必去父母

之邦皆書邦作國疑漢人所傳如此不為避諱而然謹按洪氏

之說非也石經奉詔刊樹鴻都門豈樊毅等私碑可比馬班二

史及漢人著作多避邦字即所引述論語文亦然如夫子至於

是邦善人為邦百年一言而喪邦雖蠻貊之邦懷其寶而迷其邦邦君之妻危邦不入在邦必聞邦有道不廢邦有道則知邦有道貧且賤

焉邦有道穀之類多改邦爲國譜中凡遇應行改寫應行缺筆使石經全文尚存其悉避可知

等字俱欽遵

累朝聖旨所有新刊書籍照頒行恭避字

樣書寫之諭

應行改寫應行缺筆字樣詳載欽定科場條例

欽定學政全書雖易舊譜

無嫌也所以嚴

功令也又順治七年以前廣中用故明隆

武永歷年號伏讀

御批通鑑輯覽唐桂二王年號欽奉

革除故譜中記載但書唐王桂王某年不復題其年號雖易舊

譜無嫌也亦以嚴

功令也

譜中文字或前後異文未歸一律蓋徵引異書采訪異手參差

錯出亦事勢使然日知錄曰五經文字不同者多矣更有一經

之中而自不同者如桑甚見於衛詩而魯則爲黹鬯弓著於鄭

風而秦則爲韞左氏一書其錄楚也遠氏或爲蔦氏箴尹或爲

鍼尹今按同一語助而書之粵若曰若先後攸殊同一人名而禮之子貢子贛篇章互見論語則無亡惟唯並用孟子則

由猶或惑雜書凡若此類不可枚舉至說文一書引用尤多錯

出如易以往吝又作以往遴為的類又作為駟類重門擊楨又

作重門擊楨書鳥獸毳毛又作鳥獸廢毛方鳩僦功又作翥求

屏功濬々距川又作睿畎澮距川若顛木之有聶攢又作若

顛木之有聶拊詩桃之扶扶又作桃之揆揆江之永矣又作江

之美矣江有汜又作江有涘靜女其姝又作靜女其媿擊鼓其

鏜又作擊鼓其鏜是褻絆也又作是泄絆也衣錦褻衣又作衣

錦綵衣蒼兮蔚兮又作媿兮蔚兮赤舄擊擊又作赤舄已已驛

驛駱馬又作瘳瘳駱馬不敢不踏又作不越瓶之磬矣又

作瓶之窻矣無然詘詘又作無然咄咄憬彼淮夷又作穰彼淮

夷春秋傳忼歲而漱日又作翫歲而惕日論然則經典流傳亦

語色字如也又作色艷如也更不可枚舉

非一律也故未之改也

書序在後古例也周易序卦與詩書之序舊俱列篇第中而退

居於筴末序卦移於李鼎祚書序移於偽孔傳周秦兩漢書籍

如莊子天下篇史記自序淮南子要略越絕書敘外傳記潛夫

論敘錄鹽鐵論大論文心雕龍序志篇皆同斯例漢書之序傳

華陽國志之序志後語大序後復有小序也隋唐以後序文始

列篇首又小目列上大名列下亦古例也禮記曲禮上第一疏引呂靖曰既題曲禮

於上故著禮記於下此古本小目列上大名列下之證大名又謂之大題陸氏德明云毛

詩故大題在下馬融盧植鄭元注禮記竝大題在下班固漢書

陳壽三國志亦然詳經典釋文唐刻石經皆大題在下如詩經卷首

周南詒訓傳第一列於上毛詩二字列於行下所謂大題在下

也宋元以來刻本皆移大題於上而古式遂亡紀尚書昉云陸游南唐書尚繇

古式語見錢曾讀書敏求記錢少詹大昕云余曾見宋淮南轉運司監刻大字本史記亦大題在下然二者於書

無關宏旨也姑從時式亦可也右序全譜沿革從違之例

朱氏傳芳集凡例

一古者著書罕標義例自漢有春秋釋例

公車徵士 穎容撰

魏有周易

略例

王弼撰

始以例言至杜預序其春秋經傳集解謂經之

條貫必出於傳傳之義例總歸於凡遂有發凡舉例之說
書標凡例此為權輿迺者家集編摩何關著述而抗希微
尚竊有別裁約貢獻端用鐵首簡

一古人文字不以集名漢志載賦頌歌詩一百家皆不曰集晉

分四部

荀勗撰

四曰丁部宋作七志

王儉撰

三曰文翰志亦未

以集名也文集題稱始見梁阮孝緒七錄隋書經籍志以
謂別集之名漢東京所剗屬文之士日眾後之君子欲觀
其體勢而見其心靈故別聚焉名之為集然則古所謂集

先九... 卷八
迺後人聚集前人所作非作者自稱為集也今薈萃家言
正符斯指猥名曰集諒非躑言

一書日集部有別集有總集其總集有總當世之集有總一家

之集總錄當世者始於文章流別晉摯虞撰後來集苑謝混撰集

林劉義慶撰其流也李善所謂塞中葉之辭林酌前脩之筆海

是也總錄一家者著於廖氏家集唐廖光撰後來王氏文獻

錄王氏褒肇直佐譯陳氏義溪世稟錄陳氏周振振柵其

類也陸機所謂詠世德之駿烈誦先人之清芬是也是編

專輯上沙朱氏著作聊便真懷匪云縣國揚摧古今銓衡

雅俗夫豈敢然

一古人文集祇以名氏命篇南朝張融加美號融有玉海集十卷金波集

六十而總集之玉臺珠英仿之徐陵有玉臺新詠崔融有珠英學士集其在

家集則李氏花萼集李又尚寶氏聯珠集寶羣常謝氏蘭

玉集宋汪聞集謝安等十六人作咸緣義錫名者也若夫傳芳之集編

自洛陽相君錢惟演輯祖父以下傳芳之錄定於金華學

士宋濂哀集家文名曰宋氏傳芳錄不揣舛陋濫與同稱猶之解詁繫傳

罔避雷同會要蒙求弗嫌數見思存竊比儼媿非倫

一劉勰文心明詩先列昭明文選備錄詩歌蓋詩即文也爾後

文粹文鑑諸書唐文粹姚鉉撰聖宋文鑑呂祖謙撰稟承靡異但姚氏惟取

古風真德秀文章正宗同呂氏兼遴近體同源各委稍別衡裁竊謂

五言七言造端三百劉勰謂五言召南行露已肇半章孔穎達謂七言如彼築室于道謀是其

始唱排比聲韻具體梁陳陽湖趙氏謂陰鏗安樂宮新宮實壯哉雲裏望樓臺一首竟是律體

謂唐律不與漢魏同風則漢魏亦未與風騷合派徑涂日
關運會攸開觀其會通理無偏廢

一昌黎古文尊曰起衰王楊時體亦云不廢曰駢曰散兩藝分
馳全椒吳氏謂一奇一偶數相生而相成尚質尚文道日
衍而日盛暘谷幽都之名古史工於屬對觀閔受侮之句
葩經已有儷言道其緣起略見源流沿流似分叩源卽合
所謂古文若膚不如駢體駢體有氣卽是古文信也蕭選
渾合不分於義爲古謹循往躅不復分門

一程試之文是稱帖括昔人總集閒亦兼收英華采取律賦極

多文苑英華李昉宋白等編文鑑亦登經義數首其專書別見者則唐

志之宋元嘉策通志之賦苑徐鍇所集律賦文獻通考之宏辭總

類陸時雍刻指南論

清熙以前時文

擢犀策擢象策

元祐至紹興科舉場屋之文

皆

專書也風簷所限晷刻成文寘列藝林不無軒輊是集概不羸入別錄以行

一選家棄取古有微詮呂氏編宋文鑑朱子謂其有取於文理佳者有文雖不佳而事理可取者有文理且如此而眾人久以爲佳者有文理不甚佳而人賢名微恐其湮沒亦編一二者水心葉氏謂其鉅家鴻筆以浮淺受黜稀名短句以幽遠見收近世朱彝尊輯明詩綜或以詩傳人或以人傳詩大指在崇正抑邪與一代國史相表裏茲編錄止一家無斯干系然原集具存爰施決擇零篇散落必與甄尋固云手澤念先蓋亦匠心師古

一我上沙始祖諱子為元時處士明興不仕以終厥後儒學蹶

興盛於嶺表自嘉隆以迄啟禎幾如王筠所言明德重光

人人有集省邑志乘所著錄名家總集所選掄可考而知

也不幸明季省垣之變湖州公府第淪沒諱謨有承德第在會垣大市街

五僊觀側篇籍多湮而侍郎學博兩公舉義於鄉侍郎諱實蓮國朝賜

諡烈愍舉義師殉難詳明史列傳錄御批通鑑輯覽唐桂二王本末及各志書學博諱名

臣官高明訓導殉難詳沛國世紀身殲家蹈宗族竄亡累傳文獻半就零

落雖其間瓌瑋絕特之作亦自厯劫不磨然已存什一於

千百矣可歎也今輒網羅存佚與國朝以來之粲存者

校錄於編其有續收竦登後集

一揚厲宗功光宣嗣德烜赫鴻懿多賴文字以傳薈合成書最

徵傳守隋志有太原王氏家碑諫頌讚銘集二十六卷是

其先聲後世風流彌劭好事益多投贈則有朝彥過顧况

宅詩編名臣贄种隱君書啟錄

祥符諸賢與种放書贄

艇齋師友尺

贄

南豐曾季狸師友書簡其子澠輯

餞送則有賀監歸鄉集白監歸東都

詩哀弔則有考德集

強至輯韓琦薨後祭文挽詩

蘇明允哀挽壽言則

有世綵集

政和中廖剛曾祖母祖母享年最高俱及見五世孫剛作世綵堂奉之人為賦詩

靡不

琅琅炳炳炤耀來茲它如士大夫篇詠唱酬出風入雅若

漢上題襟松陵唱和諸冊又不勝數矣式衷古誼略與摛

求都為外集

一德施文選不錄生存孝穆玉臺並登見在竇常謂文選以何

遜在世不錄其文其人既往然後其文克定故所擲拾皆

前人作也謹按論人以蓋棺而允譚藝亦以沒世而公去
噉名學士之譏就公是先生之筆削勿矜譁世遂議藏
山竊以不登見在爲正其存歿之例正集以作者爲斷外
集以所爲作者爲斷

朱氏捐產贍族斟酌范氏義莊章程損益變通規條

一完 國課各家義捐產業每年應納地丁正耗銀兩管事人務要埽數清完毋得分毫拖欠

一增祠祀祖祠向例每歲孟春舉行春祭祭畢族內子孫同堂合食以餽祖宗之餘頗有合於國語士庶人歲惟一祀之義其墓祭則祭畢闔族子孫各領胙肉一分惟程子謂冬至祭始祖一陽之始依其類而祭之人人皆宜自勉今擬添冬至合祭族內子孫皆令到祠隨班行禮祭畢照墓祭例各領胙肉一分其支發銀兩依牲牢時價低昂不爲拘限

一優耆老每年冬月頒給冬衣度歲銀兩七十以上每人給銀一兩四錢八十以上二兩一錢九十以上二兩八錢及百歲

每年給銀七兩其豐饒不願收領者聽又頒喪事銀兩七十以上每人給銀一兩四錢八十以上二兩一錢九十以上二兩八錢及百歲給銀七兩其豐饒不願收領者聽

一端蒙養每年四仲月舉行倍經之會於祠堂許族內學童年十五以下端重樸醕者執經求試仿唐書選舉志以禮記左傳爲大經詩周禮儀禮爾雅爲中經易書公羊傳穀梁傳爲小經各長老認真面試以倍誦如流默寫不誤者爲合式大經賞銀七錢中經三錢五分小經一錢八分以此經領賞者本年之內不許復執此經求試能通倍五經每經給賞外另加獎銀一兩四錢通倍七經二兩一錢通倍十三經三兩五錢其佻達頑劣者經雖熟記過不賞

一教成材族設家塾每年敦迎甲乙科中學行兼備者爲師其有素孚士論畜道德而能文章則不以科第論脩金銀二百兩膳金銀四十兩贄儀節儀迎送夫馬銀二十兩合子弟受業其中月課獎賞隨時散給或有茂才異等覃精經史博通掌故講求吏治脩述辭章仍仿照阮文達公詒經精舍學海堂事例厚給膏火以示優異其不脩士行貽玷門風者擯出塾塾中購置書籍用資見聞應給銀數臨時酌量不爲拘限

一廣登進祖祠獎勵子孫赴考應官卷資路費皆有成例捐項下擬加子弟應試銀縣考七錢府考七錢院考七錢生員歲科考加銀一兩四錢貢監生員報考遺才加銀一兩四錢生員考拔考優加銀二兩一錢貢監生員大比入場加銀二兩

朱九江先生集
八錢拔貢優貢 廷試加銀一十五兩舉人會試加銀二十
兩舉人大挑一等赴官加銀三十兩進士即用赴官加銀四
十兩部曹中書回京候補加銀五十兩庶吉士回京散館加
銀六十兩榜探回京供職加銀七十兩翰撰回京供職加銀
八十兩其銀皆屆期支給不得探支若銀經支領赴試者無
故而不入場應官者無故而不進京到省領去之銀照數追
還

一恤惇嫠族內孀婦有無子無孫阨窮堪憫每年冬月給冬衣
度歲銀一兩四錢係老疾顛連不能自食給銀二兩一錢若
遇饑年族中義倉按名賑濟該孀婦領賑外應得之銀照常
支給

一收孤露族內孩稚男女父母雙亡期功親屬無力收養者管
事人查明告知族長紳耆酌量體恤無令失所

一施棺槨族中男女亡故委係無力買棺有待鄰里攤合者管
事人查明給棺銀七錢十五以下給銀五錢十歲以下給銀
三錢四歲以下不給已殮埋者不補給

一施墳地捐產項下置義地一邱編列字號號容一棺不許寬
占族中男女亡故委係無力買地有待鄰里攤合者管事人
查明給地一號安葬屍柩久停親屬零落將至暴露者給地
一號安葬棺已歸土圖遷義地不給小口不給

一籌意外捐產項下所有田畝基塘及城鄉鋪舍儻遇水火之
厄租息減成其年應行支撥各數目卽照見年收得成數折

算支發如收租三四成五六成七八九成管事人將有成數無成數各租息通盤打算看得若干成卽以若干成支放無庸其收受者毋得以常年定額取盈致貽舉債虧產勉强補苴之累各安所遇勿替遠猷

一留推廣族屬日繁男婦約計五六千口若仿義莊事例口日給米一升歲給絹一匹夫豈易言特各家捐出置產實銀尚多將來產業陸續增置租息亦陸續增加瞻族事例原可踵義莊往躅日推日廣彼江州陳氏浦江鄭氏通財世世號爲義門族鮮單寒芬流史冊亦事在人爲耳

一防虧空族分三房祠嘗分房輪管每年值理到班預於上年十月責成該房紳耆將人名舉出接辦後或有侵吞虧空情弊責在該房賠補今捐產出入數目亦交本祠見年值班帶

管不另選擇賢能議定租銀一兩抽出三分爲管事人酬勞
酬勞之外不許分文挪借儻有侵吞虧空責在該房賠補與
祠嘗同

一建義倉族繁人眾現存義倉資本無多尚須子母相權厚集
其力將來遭荒放賑賑銀賑米賑粥臨事將情形察看擇善
而從若夫差別極貧次貧省視大口小口防其擁擠掖其顛
踣閑其男女藥其厲疫熟思審處事有萬端總期痛癢相關
使血屬周親不淪浩劫而已

一勸族居周禮大司徒以本族安萬民一曰媿宮室二曰族墳
墓鄭君注同宗者生相近死相逼也孟子井地之議亦云死
徙無出鄉出入相友守望相助古人勸親親固如是也義莊

規條身不住平江府者米絹錢皆不給今恪遵前典凡不在
九江堡居住者一切頒給均不許引族誼分霑惟擢科第者
膺仕宦者謁祖旋鄉則不應遐棄蓋策名 清時爲宗族交
遊光寵仰體祖宗之心尚顧而樂之耳

一脩條例天下無不做之法亦無不變之法考范文正公集義

莊規矩文正創舉以後奏請御批者再

英宗治平元年范純
仁甯宗嘉定三年范

之指揮脩定者十有二自文正至之柔凡五世自英宗甲辰

至甯宗庚午凡百四十七年嘉定以來至於今指揮脩定者
又不知凡幾而義莊猶巋然屹然赫赫若前日事遙遙華胄
食德如新薄海訓行人無異望固由明德之遠其世守有人
維持不墜有足多焉易曰物窮則變變則通通則久今之條

例後日有任維持脩定之責如范氏後人之繼美希文者予
日望之

朱九江先生集卷八終

再傳弟子校榘於讀書草堂

朱九江先生集卷九

文

明贈嘉議大夫兵部左侍郎原任四川夔州府知府朱公

神道碑

昔漢治多循良吏至六朝而衰矣而宋元嘉中始興從事朱萬嗣少豫獨以廉聲振海內讀史者豔稱之明祖奮起布衣重親民吏吏治號不污至中葉而衰矣而我八世從祖夔州公仕神宗朝以治行第一拜璽書之賜夔州廟祀至今朱氏自兩漢三國以來人物盛於東南爲甲族四姓稱首而其良吏俱出嶺表南海九江支系又始興分也然則公之經德秉哲以追配於前人者豈偶然哉公諱讓字次夔號絅庵先世居始興北宋改曰

保昌爲保昌人南渡末季有諱元龍者奉令甲徙南海汔今爲南海人徙居七世至公考文直蚤卒公貴贈承德郎公旣幼孤敦敏嚮學治毛詩戴記能濟其精與陳參政萬言陳同知良珍從兄通判謨結侶劇切舉嘉靖三十七年鄉試公車十六載始成萬曆二年進士初授福建南平知縣調繁江西臨川再襄鄉試事作令兩考擢南京戶部河南司主事差權浙江北新關晉員外郎郎中皆在戶部以京察高第簡授四川夔州知府南平當八閩之衝困於供億公務以簡貸息民谿水暴漲壞田廬漂人畜公不蒞報碾放倉粟主者難之公奮曰文牒往來溝瘠何賴有譴令自當之無它及也又竭私俸四賑民獲更生臨川人苦歲運窶者至俵債妻息以應公類其眾姓置一人爲長酌里

道中爲儲計畝均輸江航漕輓往來稱便邑有金隄溉田萬頃
圯廢百年莫能脩繕公殫力經營靈谷樊水閒功成永賴比遷
邑人祝轅若失怙恃其筦戶部也辜權權衡登降偃僕與傭卒
襍作胥吏莫能爲姦差督浙關掄貪疏滯宿弊汎埽暇則校士
武林指授經義名士多出其門其守夔州也請巡按行一條鞭
法瘁心贊畫官氓帖帖不佻張而事集會大旱精誠露禱僅二
日而雨霑足夔人呼爲朱水師笛尺書躬親料量勤幹爲列縣
表率數月而夔大治頌聲灌騰院司交薦於是天子欲大用公
降璽書勞曰朕撫有方夏軫念民艱每思良二千石布德宣化
嘉予天下維新而於典郡尤亟其有治行明章薦剡茂騰者特
簡其人而畀之以旌前勞而勸來勩璽書豈有愛焉爾四川夔

州府知府朱讓惠從公溥威以廉生著鉤距擿伏之神塞奔競
夤緣之竇薦書特最朕用嘉焉茲授爾階中憲大夫爾膺茲榮
寵益當勵報稱之能果其績並龔黃將採一郡之政成而召卿
矣子大夫其敬承之公遂入覲旋至公安偶疾憩驛喟然曰余
甲戌場前夢蠶滿衣褰蜀古蠶叢地也余字次夔今次夔矣遽
引疾歸公爲人宣髮廣顙目秀而慈未嘗示骯髒之色與人言
不衣而暖然通而有執宰邑時張居正當國政尚嚴急有司迎
指慘澹少恩公力持大體除苛解燒人用大和及在曹司內閣
申時行余有丁盡反居正所爲一切縱弛公數執法曰江陵特
主持太過耳其綜核名實是也蓋公爲政無心寬猛亦不尚苛
廉志在調劑時宜拯民疾苦使廬井見生人之樂故在政不擾

既去而民慕思之當官留都澄海唐吏部伯元喜講學順德歐
工部大任稱詩公則多談吏治三人交莫逆而趣尚不同大任
嘗語人我輩喋喋甯如倉曹能及物邪倉曹公攝職也其爲名
流推服如此既歸召補湖廣鄖陽知府不赴中外交章以用不
盡才才堪大受薦卒不起惟日以福惠鄉閭爲事萬曆三十二
年卒壽七十葬鄉西南馬山改窆大望山祀南平臨川名宦郡
邑鄉賢後四十四歲以孫實蓮卹典推恩諭祭贈公如其官配
關恭人閩德最著生子疇庠生贈兵部左侍郎側室子田甸峻
田庠生贈中書舍人甸庠生更名賓揚孫十五人實蓮戶部郎
中卹贈兵部左侍郎伯蓮戶兵兩科給事中會蓮推官叔蓮遊
擊協蓮儀蓮期蓮並庠生公蓮保蓮觀蓮現蓮觀蓮明蓮振蓮

世蓮女六人俱適名族長壻同邑陳熙昌吏科都給事中外孫
陳子壯東閣大學士兼兵部尚書公旣以治行高天下而從子
署青州知府凌霄繼之孫實蓮外孫子壯且毀家湛族百折完
忠以終一朝報禮之局論者謂公德匪直配前人也其穀後尤
遠焉公於品秩神道當得立碑而遷延有闕迺者家牒繼甄遺
文用討於時宗英耆德相與太息曰蕕石幽宮冀垂久遠墓誌
以之揭銘表阡殆將令百世後式墓輸敬想見其人用以興起
秀良扶樹風化不可廢也粵求當仁式讚先烈小子無似敢述

斯銘銘曰

朱氏二俊槐里桐鄉公起而參是曰三良槐里說經公如其确
桐鄉獲民公符其卓况彼少豫奮治南中後公嗣音豐山應鐘

爲人磊磊爲官亶亶敷予腎腸瘡爾瘡痂華嶽削天其麓則平
汾澮流惡不疾以清古號惟良甯非豈弟有沫而濡勿毛而鷲
帝曰俞哉卿可屏毗毋忽螻穴庶屹金隄拱日方東歸雲忽止
止足遺榮如聃史指以其餘恩福及閭鄉舖糜與繒治竇成梁
以其餘慶賴及後昆磐石之宗忠孝之門小子庸虛易世爲令
寅守徽章懼乖心鏡隄志爰佚豐碑肆擗世有墮淚文無愧辭

皇朝 賜諡烈愍明贈嘉議大夫兵部左侍郎原任戶部

郎中奉敕團練水陸義師朱公神道碑

大清乾隆四十一年丙申

高宗純皇帝詔曰崇獎忠貞所以風勵臣節凡勝國死事之臣或死守城池或身殞行陣事後平情而論若而人者皆無愧於疾風勁草各能忠於所事豈可令其湮沒不彰其如何分別定諡之處著大學士九卿京堂翰詹科道集議以聞議上我六世從祖原任戶部郎中微龕公

賜諡烈愍予祀忠義祠惟時子姓感激泥首羣願聲諸金石以播寵靈而大書深刻迄今未果其末孫次琦泣而言曰深惟我公純勤大節自筮仕以迄結纓靡不殫極血誠永矢存歿非奮

發一時者比今幸際不諱之朝其事狀迺未彰徹大行於公靖
獻初衷無憾也何以贊

聖清之光明而昭示於罔極哉僉曰善子其以銘謹按譜牒公
南海九江朱氏諱實蓮字子潔號微龕祖讓守夔州治績冠萬
厯時父疇廩膳生著文行公頎身頰面角犀隆起腰腹十圍少
須麋大音聲顧盼偉如神人七歲能屬文與姑子陳文忠公子
壯並有聖童之目未冠舉天啟元年辛酉鄉試第三人分考江
陰李忠毅公應昇奇其文拔冠一經久在公車時望益隆巡按
劉呈瑞提學魏浣初疏舉境內人才皆第一崇禎十三年庚辰
授浙江德清知縣時中原盜熾州郡陸沈捧檄者蹙踏懷兩端
公謂擬循東南所以戡定西北天下事尚可爲也忼慨誓行初

蘇浙仍歲奇荒繼以旱蝗民飢無食公到官綢繆賑恤存活數
萬家明年夏浙西三府大水湖州尤劇公百方拯濟顛大府蠲
緩以貸災黎不省七月浙撫劾德清崇德兩縣誤漕是時政府
方尚搜括遽票旨逮治緹騎洶洶崇德令趙夔自縊公奮曰唐
石烈士馬前一騶耳尚思自致於萬乘之前以鳴主將之勞烈
方今聖明在上居高聽卑坐使萬物顛顛而陽澤不施羣方戴
盆而天光不照臣罪不容誅矣吾甯歸死司敗救此一方民遂
就詔獄獄中極陳地方荒苦大略謂天災流行何處蔑有未有
四五年來飢饉薦臻旱歿嗣虐予遺靡定降割繼行井邑爲墟
民物將盡如浙西之甚者去年夏五甫交龍水驟發蘇常嘉湖
數郡鉅浸稽天吳江德清襟腹太湖如坐釜底塘洒以西尖山

以北穀蔬淪沒室廬漂蕩人畜蔽江流而下帆檣緣木杪而渡
男號婦哭天日爲昏其有乘高駕浮幸不卽斃者驚癩飢羸有
孩稚推棄於漲中夫妻子母枕藉待死於水涯者矣微臣受任
未久四出拊循目擊情形痛心酸鼻自傷爲人司牧政刑頗僻
措置乖違無以導迎祥和覆以招災速戾使萬戶生靈顛連若
此此卽肆微臣於市朝正溺職之誅謝橫死之眾是微臣所大
願也當已兩申撫按面要道府籲懇丁糧漕白一概奏蠲發帑
截運以資接濟昔宣宗皇帝聖諭賑飢當如救焚拯溺何待勘
爲煌煌大訓我朝鼎命之隆在此也微臣方且噢咻老幼撫摩
創夷勉之以忍死須臾慰之以大澤將至而不謂漕兌嚴期突
然逼迫矣夫蘇浙數郡錢漕金花銀之偏重天下所知也接遞

插淺諸色日穰苗撞竿等差徭取求之無藝幫貼之煩猥天下
所無也荒旱以來帶徵有三年五年添派有練餉助餉又天下
所苦也萬一調恤無聞追胥如故虎冠之吏敲吸爲能藐爾殘
黎展轉之下惟有逃亡逃亡不能因而鋌險强者旣囂而動弱
者必隨而聚矣不幸或連一二城之地有枹鼓之警國家胡能
晏然而已乎比者中原多故風聲播流保無有梟獍之徒包藏
禍心乘閒思亂者初猶煽劫繼且盜兵裹誘漸繁橫流益潰陝
晉楚豫其已事矣是可不爲之寒心哉是故欲回天意先召人
心欲保東南財賦之疆先予億兆更生之樂伏願皇上獨斷聖
衷截漕駁放徵派盡蠲或令飢民濬吳淞白茅兩江以工代賑
若此則收行水之利廣澤枯之仁答列祖眷顧之靈弭五行飢

穰之患塞姦人窺窬之竇鞏皇圖保定之基孰與屯一時之膏
釀滔天之禍而後悔無及哉若此則微臣雖膺大僇伏斧礚且
將含笑入地矣疏入帝驚歎動容踰月普免直省存留起解上
供本折錢價百姓驩呼謂公有回天之力德清漕兌旋亦報足
獄遂解謫南直松江府照磨起臨淮縣知縣聞內艱未赴累擢
刑部廣西司主事兼兵部武選司主事戶部郎中當是時帝知
公忠實有意嚮用故驟遷其官會憂歸而止亡何南北都相繼
淪陷公忿不欲生丙戌繼丁憂唐王亦亡陳文忠迺與廣督丁
魁楚援立永明王於肇慶故輔蘇觀生懷貳別立唐王弟聿鏗
於廣州永明王起文忠督軍務並敕公團練水陸義師敕曰破
斧之章首爲輔臣誦之次卽及於爾矣欽哉會

大兵入廣州聿鏘執死明年春張文烈公家玉陳忠愍公邦彥
及新會王興潮陽賴其肖先後起兵公亦以七月墨纒舉義盡
毀其家輸軍實與文忠募旅於九江舟師千餘艘多蜚戶番鬼
驍勇善戰迺約忠愍共攻廣州撫花山盜三千人僞降得守東
門結衛指揮楊可觀爲內應舟師剽銳甚一戰奪西郭礮臺焚
敵樓殲突將城中大震嚴詰反側可觀事洩死三千人皆坑殺
兵遂衄忠愍奔三水故御史麥而炫破高明來迎迺入攝縣事
以待西師九月

大兵逼高明爲十覆迭攻之公激勸忠義晝夜登陴拒守五十
日而城陷文忠被執公從容西嚮再拜齧血題絕命詞遂握刀
帶雙韃馳下冒陣而死年四十六公族父攝訓導事日名臣亦

不屈死官生區懷炅舉人區銑以下從而死者二千人城中男婦皆喋血迸命無一生降者難後其城遂空實丁亥十月二十九日也次年永明王贈公光祿寺少卿廕一子入監御史饒元璜言諸忠臣賞薄晉贈嘉議大夫兵部左侍郎三代同官諭賜祭葬再廕子國子監助教錦衣衛正千戶恩卹有加焉配區淑人高明戶部侍郎大倫女有賢行子二國薦國藹公幼有大志雖長華膺被服必於儒者工詩文尚氣誼士類歸之至性天植事君不辟難馭眾無匿誠其發也如鬱燄怒雷屈而必達常自誦曰吾曹旣效命於世有可以尊主庇民者則忘身爲之其它禍福之來有不自我者不足較也初公之亡也

大兵義而掩之故國薦等能以喪還祔於夔州公兆沈薶芳曜

百有餘年卒能尊名苾祀朝野具瞻蓋幸逢

聖天子表正人彝允釐皇極而亦公順受天明安行不惑故忠
孝之道用光幽潛之德必發也烏虘禕哉銘曰

公以文興騰躒稍增不究爾能銅墨是膺叱呼神君官謂僂民
逢憂召屯甯丁我身養其疲羸寬其撝笞飛輓而虧吏曰不治
玉階碎首闐尸甘受容臣苦口臣死不朽帝有恩言一歲九遷
有隕自天旋入雷淵刑天干舞盟津捧土旣獲死所安於堂宇
惟天降衷惟

聖發蒙匪私於公惟以

教忠巋彼兆域有巖

制敕騎下軾式是倣是則

贈奉政大夫府同知銜朱君墓誌銘

咸豐庚申置閏後七月族子福元攝衣冠奉功載叩庭下愬愬拜曰先奉政棄不肖孤踰十年不肖孤沐食麻蔭無能邁迹發名以光揚其志業今荷 國寵靈而先緒卒沒沒未顯厥戾滋大吾叔牽哀假之遂拜且泣余曰然惟迺考奮而勤身愿而不忘本用能延展世德以庇賴其子孫於法得銘謹按君南海九江朱氏與余同祖者三世其四世爲同母兄弟故余與君衡宇相望爲比鄰君祖一傳爲靈川司訓諱文錦以明倫謹身教士有名嘉靖時司訓八傳至君大父斐章父存禮皆微在田畝君孤貧棄讀年十八迺跳身西徼營業於龍州龍州土劣君安之數年繼籌鹽筴於越南之河內而歲轉於滇粵往來鎮安開化

閒其後置筵寄帑不離河內休老告終終在故居將終遺言曰
吾薄祜離鄉雙親先在淺土爽塏營遷崦嵫遽迫汝曹速成吾
志以贖曩愆吾有嫠妹貞苦無依瞻老篤終旣吾後責餘無它
言然則君雖長爲旅人乎其積念未嘗不倦惓厥家也君卒以
道光廿九年三月廿六日春秋六十有九初厝鄉之大望山越
九載迺定兆於網帶山配同鄉張氏生子啟元筵室子奎元耀
元福元顯元啟元後君五年歿耀元後君以八年福元援例同
知顯元援例州同知女二人孫八人初君之出也僅一再甯家
於後去鄉且三十年卒獲舊里考終子孫逢吉今奎元福元等
又克式廓慶餘以不瑕於遠永懷明發以篤厚於宗皆善體君
勤身不忘本之懿而推大之烏虜可尚也已君諱庭桂字兆榮

後更曰廷貴又字慕韓同產四人君行長惟君以子贈奉政大夫銘曰

蹇惟羈孤能蹶興爲山卒匪因邱陵西逝賁古南麓冷雖弗陶頓亦載羸雖弗錢聃亦有齡卅年爲世飛電驚歸如化鶴遼東丁網峯蔥鬱邱首稱降嘏兩地生甯馨不視德載以有銘

此處為正文內容，因圖像模糊，文字難以辨認。可見其為一列列排版的傳統文獻。

清故朱少府墓誌銘

道光廿一年辛丑十二月照山少府無祿年三十九矣前卒召子兆鼇跽志遺訓且使乞銘於其族父次琦泣言曰吾生無善於世不自揣控歿願有庇於子孫若爾吾哀必以夫子銘是吾果不慙棄於鉅人先生而有辭於來世也爾其勉之兆鼇弱能知哀將窆則哭來請銘屬余人事攘攘始以公車繼以憂未有以應也丁未冬余歸自京師將就官山右拮据稱貸事益冗矜而兆鼇每見則搏穎請如初辭加巽無怨而顏色加蹙切以悲余心愧之抑無暇以爲然自赴官以後平生文字之責以遽皆不省錄獨少府存歿兩世辭意惻款時往來於胷中當夫寒更支枕長途馬上偶然振觸未嘗不怦怦有動神怳怳而若有亡

也少府蚤孤席温飽游里巷不敢以辭色加人平居無子弟之
過假能永年或將有立獨不幸死耳今兆鼇祇奉先緒勛率諸
弟如其謹又加才焉少府爲不死矣少府娶關氏無子側室子
兆鼇曉鼇乘鼇女四人孫三人咸豐丙辰卜營少府新兆而余
適解組歸迺大慰曰余今則可以銘矣蓋踰少府之歿忽忽十
有六年逝者有知其將起舞樂受而緇此諾責矣乎銘曰

銘君藏姓朱氏諱祥光耀懷字小字報與號四父佐昌微無位
君捐輸爵從未一命膺年遂躡鳳山麓滃涇漬徙象嶺高燠地
惟有子邁祥懿我鑱石瞑君背無後艱視茲志

廖南邨墓誌銘

朱次琦曰予讀歐陽子梅詢墓誌以謂士果能自爲材邪惟世用不用耳三復其言而悲之竊慨生平舊遊多抑塞之士而若廖南邨關璞軒兩孝廉尤有可悲者兩君同年舉於鄉俱不及仕盜起粵西關君薄遊及於難廖君考終牖下亦不試以卒其標格故不同關君疏儻才氣有過人者廖君姍姍細謹用財較緇黍行事有尺幅假而當官不失爲惓惓吏天下之擾甚矣其端由吏治之汙居恆輿馬服玩聲色之好奢麗百出且復豐於獻納參於酬應謂之開展若而人者皆非腰纏入官者也壹取之於民而凡丁胥豪猾倚勢作威又喜言官憚受賕以恫嚇其民而放其無涯之欲日朘月削怨府毒深羣相敵讎橫流遂潰

此方今之大患也然則關君推辨治材其於攘剔時弊或不如
廖君有益也君南海九江廖氏諱熊光字偉耀自號南邨父曰
鄉飲賓長松歆歆行善有掩骼葬鬻之德先世由南雄來遷南
遷諸宗故多衣冠族而廖氏世力農不顯至君始耽讀發名流
聲於代爲時聞人幼擅文譽橐脫輒驚其長老問業於邑通儒
梁教授序鏞得其指授出試有司邑令徐公香祖奇其文將拔
選首以故爲桂按察文耀所先君弗懟明年郡公烏爾恭額卒
拔君選首受知於故相常熟翁文端公補弟子員淹黌舍二十
餘年咸豐改元今尚書萬公青藜故巡道呂公倌孫主試乃以
第六人中魁選比落第南歸君年且五十矣君性靜退不爭物
先與人交不爲翕翕熱然桑梓利害亦引義弗讓也鄉人積穀

備荒築場設肆又內河脩繕隄圍增庫倍薄費皆不貲君始終
其役遭亂爲惡少所窘事定寘不校人服君長者儉衣穀食而
贍卹寡妹甥忘其孤女兄無子卹之尤至疾革猶分乞餘財蓋
爲人深中有主不混所施如此予去鄉久假還見君里第君亟
謂曰子爲令聲績旣著行見知上下萬一得所藉手一吐胸中
奇偉亦可壯也胡速歸君卒之歲

詔書屢追予趣赴

闕雖不能用君言至今心媿之由斯以觀君雖不形缺缺乎其
志事蓋可知也嗚呼

國家仁覆區宇變醜養瘠期使文無害者爲治中外顯僚下暨
州縣學校之司取諸鄉會兩試號爲正途厥後人員回冗雜而

多端自予童時里蓋有十三年甲科而歿於需次者其鄉科則
予以道光己亥獲舉己亥以來汜於今里中獲舉者二十有三
人第進士者五以貲入仕者二餘或汎浮江海歲歲隨計吏或
久次勸遊臥家不出甚且溘隨運往足可傷悼若君與關君者
則又有李君虛谷關君雪湄予宗人梧生雲巢亡兄晚亭辰階
並先後齋志歿計三十年中無以鄉舉授官者壯佼之夫忽忽
奄就頽暮而逝者已不可作矣是可爲一世人材惜而世道之
感當何如也君有享帚齋集以同治元年五月八日卒享年六
十妻鄧孺人儉勤稱君配先七年殂歿子二曰安泰諸生日寬
泰女子子三皆得其適孫一人其葬在宅後之龜山祔以孺人
實逾君喪若干月日安泰來謁銘子邑邑悲懷數朞不能搦筆

安泰等將以今夏某月脩君墓前請乃申不懈益堅且曰匪先生無以信後之爲志乘者予言非能重君而安泰之孝不可忘也嗚呼忍不銘銘曰

南邨其有知乎南邨其有知乎銘君者里故人朱次琦也惟初有與期惟卒無所施予惡知夫所歸咎而徒貽後死之悲也

子... 其... 人... 未... 出... 而...
 出... 不... 論... 曰...
 主... 以... 計... 之... 繼... 志... 兼... 善... 乎... 言... 非... 謙... 重... 保... 而... 安... 泰... 之... 終... 不... 可... 忘...
 矣... 然... 雖... 以... 公... 真... 某... 日... 治... 林... 墓... 而... 臨... 以... 巾... 不... 辨... 益... 望... 且... 何... 謂... 哉...

賜進士出身分發湖南知縣梅坪陳君行狀代曾勉士

劉作

君姓陳氏名亨時字信民以字行別字任甫號梅坪南海九江鄉人也曾祖叔駿祖在泮皆庠生父履恆嘉慶己卯科舉人惇行孝弟績學綴文家居授徒歲常百十人學者號心農先生著碧樓全橐文獻纂略四書蠡說若干卷子二人長垚桑邑庠生次卽君君生有異徵少從其祖口授詩歌輒能成誦稍長爲文崢崢見頭角一時父執若明監丞琢如關明府穗田輩咸器重之旋丁外艱事伯兄有姜肱陽城風居常互相師友而君聰慧過人一經指陳輒心領神悟發憤淬厲往往秉燭達旦文序詩壇卓卓有聲道光甲午科舉於鄉丙申成進士授知縣分發湖南初嫡母寢疾慮不及見君口喃喃呼君不輟已而假歸得侍

湯藥數日人咸謂孝感所致云性溫厚器量宏深切於濟人銳
於任事癸巳之夏水決桑園圍三丫基鄉閭乏食君駕小舟勸
分沐雨櫛風不憚勞瘁不足則倡發鄉之南方義倉又不足則
倡發同濟倉存活無算君故無中人產然施與恆逾於富人丁
酉西潦大至隄不沒者纔咫尺淫雨百餘日內水漲溢君加築石
隄以防之首捐金爲鄰里先岑紀虞陳仙儕兩茂才歿妻子無
所恃君偕同人醵金以助其見義勇爲多類此陳氏於九江爲
巨族歷年逋賦餘百石候補府經歷明公達周歷催科吹角持
軍械捕逋賦如捕盜人皆震慄或空室逃亡君設法勸督不數
月積負頓清族人無罹文網者九江地大物博良莠雜出儒林
書院鄉人讀灋所也羣舉君及曾君銘勳馮君汝棠明君倫主

其事豪紳某老矣猶以博爲業至是不改君曰剛吐之柔將誰
茹乃鳴於官擒治之鄉南之山故多叢葬無賴子發冢爲姦利
官屢禁之不能改君密訪呈其主名雖族人不少貸由是惡俗
稍革良善倚之無何邁疾以十二月癸丑卒年三十有七弔臨
者相向哭失聲遠近皇皇如奪所依據明廣文離照語人曰某
自大故後老淚不滴者已若干年所矣及葬舁柩所過皆歎有
泣者初君之卒也厯三日支體猶溫輒顏色發越如平時其兄
珪燻守之不殮鄉人遽奔走相告進士君復生天以福吾等也
不遠十數里問音耗門外萬頭如黿肩以下皆隱旣卒不起則
大戚數萬戶中洶動擾亂者屢日嗚呼君處一鄉而一鄉服若
此曩令藉手由縣令游至大府建白更何如哉君之不年一鄉

之不幸抑非特一鄉之不幸也君娶關氏無子以堽燾之子爲
嗣釗與君同鄉雅重君君之主儒林書院也實釗敦勸之今君
墓有宿草不忍其行義就湮沒爰從堽燾請掇其大者爲狀將
託立言之君子而圖其不朽焉

重修四世祖墓祭文

維道光十一年歲在辛卯冬十月己卯朔越祭日甲辰宗孫某等敬以金花綵紅牲醴果品香燭楮帛之奠敢昭告于四世祖考南塘府君妣潘氏太安人之墓前曰伏惟元靈煜爚山澤緬緼周家蓋耐漢道增墳風流彌劭日彪以文龜趺獸巖紺宇丹垠旣固旣完庀此幽泯神之格思有萬其春洎我君蒿非故而新允惟烈祖誕英勝代懷寶自怡含輝未沫儉德之共勤思不匱克勤克儉昭茲來裔天鑒不誣厥後斯大人亦有言第祿惟人祖之允嗣旣庶以蕃旄倪引翼螽揖麟振非兆地靈孕秀荀陳曰由祖德道義之門人亦有言振族亢宗祖之允嗣多丈夫雄悉數乃留更僕未終門無白丁第高黃甲胄子佻佻征夫捷

捷亦有旄鉞專闡巖疆亦有錦衣飭紀扶綱縮符而尹執戟而
郎薇垣待制柏府封章二魚肆席五馬分行濟濟卿寺載翺載
翔觥觥司馬載晉載揚顯榮褒大式告崇岡曰救祖功而熾而
昌人亦有言世渺象賢祖之允嗣上不辱先民伊父母

國伊甸宣澍雨隨車敷歷中邊

京室賢勞江嶺黔滇吳閩楚越東土西川匪直也人能官奏報
正氣扶倫惟忠惟孝致命遂志曰祖彝教凡諸徽德非僭無徵
四百年茲發育菁英在我後人勿替寅承載叩幽宮載摩前誌
有隕其初滋予心悸畚揭旣設陞盾斯齊壹喙同磨力併心毗
歲功以時履武前規肆安且吉予懷不迷吉蠲用享濟漆升躋
求陰求陽祖無我遺祖字我人瓶壘婦子胥康而生曾孫惟主

祖祚我人騰茂蜚英噓枯吹生奮爲

國楨英英射策驤首觚稜斌斌膺仕

冊府垂聲表阡誓墓先民是程勿壞爾基勿棄爾成臚忭薦辭
陟格式憑尚饗

題蘇方憲尚寶

掛珠垂贊表刊書墓光只景跡
 於對爾基於葉爾如觀朴蕙
 國蘇吳英娘策觀首厥楚憾城
 顯升
 臨海其人額黃輩吳靈許穴土
 存獄

公祭陳梅坪大令文

維道光十七年大歲在丁酉十二月甲辰朔越十二日乙卯闔
鄉紳士某等敢以清酒庶羞之奠虔告于文林郎在籍湖南知
縣梅坪陳先生之靈曰嗚呼先生行成家範材蔚國楨允昭士
望亦重鄉評當童牙之孤露已不師而自成越駿足之超軼乃
騰茂而蜚聲懿脫白未久甫踰歲遽謁

帝于承明信乎達人有後而擢巍科登上第蓋歷兩朝三百有
餘歲而復振其家聲何志盛而氣銳俄棟折而榱崩豈巫咸之
夕降與豈泰山之輒召與胡爲乎禱肺石而靡靈嗟夫以公虛
抑之懷縝密之慮強忍之性使馳驅于

皇路則入可以彌綸夫袞職出可以霖雨夫蒼生彼龔黃卓魯

猶是人耳充公所至庸不克與之方軌而並行今其若此
國家何以收用人之效黔首何以慰望澤之誠三楚何以馴華
離之俗五嶺何以被桑梓之榮奚怪商農弔于市婦孺弔于庭
下至寵姬走卒莫不淚歛而心怔何況某等辱得人于鄉校熄
羣議于黎蒸方脩廢而舉墜慶百度之維貞嗚呼地大則物博
族眾則寵橫故咸謂此邦之人不可與明白公爲之而父老觀
化相與忼慨太息以爲百年來無此枕席之甯嗚呼一旦奪公
以去孰與起渠溝之瘠孰與調雞鶩之爭重有憂者高山難仰
大樹飄零則四達之遠方將舞狐狸而噪鼯鼯彼血人于牙擇
肉而噬者且暘睽其並興又孰與殺其威而折其萌也嗚呼豈
惟某等知公九京之下亦爲心愴吾見風雲滃于墓道猶鬱怒

其未平誓指誠于天日守眾志之如城踵逝者之遺志勉造福
于民氓嗚呼公之目可以瞑矣盍鑒此臨風之長慟與薄醜之
維馨尚饗

蘇轍內贊

予兄道潛和公之曰臣以剛突德鑿出辭風之異其然其然之
其本平善計獨于天日中界志之暇越朝涉海之重志也

祭陳大令文

維道光十九年歲在己亥三月日同研生朱次琦敬以生芻之
奠祭於亡友任甫大令九兄之靈曰吁嗟令君時之峻造民望
國華人龍天寶離彼不祥嗚呼宿草不鄙謂余幽贄先盟私我
下我貺我以誠至今我眼寫君儀形云何簪盃警欬無聲云何
椀俎不覩虧羸躋君之堂降君之庭嗚呼杳矣真不弔矣夜壑
藏舟永潛曜矣悠悠百年芒芒九紘吁嗟令君謀面來生嗚呼
哀哉尚饗

Blank manuscript page with vertical lines.

北上會試祖道文

維道光二十三年月日會試舉人朱某虔以柔毛剛鬣清酌庶羞之奠致祭於水陸道塗之神曰曩游萬里跋履風塵南浮北走起憊亨屯匪曰予智惟依於神三年不鳴又及茲辰昔丞相宏謁公車者再迫欲求伸緣飾經術嗤點千春亦越昌黎兩舉有聞爲古碩儒爲時貞臣是一君子一蕪一薰子矢諸夙夜神知其勤於戲不可知者遇不可信者文不敢負者學不敢玩者身風飄車偈江汜河濬尚勸相予宏濟關津尚饗

南海縣黃鼎司南沙三十鄉鼎建石隄祭河神文

維道光年月日南海縣黃鼎司紳士原任廣西桂林府知府張業南等謹以柔毛剛鬣致祭於河道之神曰滔滔北流水鉅維擘也曰瀕曰武曰桂曰湟駢支來下萬弩突也寸瀾朝增下流百也時而牂牁侵焉益怒且謹如火加薪如虎翼也吁我南鄉訝當其劇也沙走雷駭日降割也非神之不愛人消長逢其適也哀我人斯至此極也井竈田廬隨蕩涵也鼃黽斯遊魚龍宅也翦及瑩瘞泣潛魄也嗟嗟我人曷以供王稅於上下何以守存歿也今之不圖民氣將墨也爰呼於衢解衣散錢大聲疾也絡石隄波漢遺法也如彼錢塘磯固羅刹也如彼吳篔圍震澤也我聞在昔畫不一策也水犀控弦波臣北也西門偃僂河伯

擲也悍而不可爲而黠不可跡也惟神茲歆鑒誠臆也牲牲阜
肥飲香穠也砥平鏡清歸墟勿溢也海復爲陸石斯泐也滄爲
祥雲蒸爲和風甘雨渥也歲功順成衣充而腹實也江漢比靈
揚馬出也永永萬年饜神德也尚饗

之官山西祖道文

維道光二十九年歲次己酉正月庚午朔越祭日丁酉

賜同進士出身文林郎分發山西卽用知縣朱次琦謹以柔毛
剛鬣清酌庶羞之奠致祭於水陸道途之神曰琦惟不佞行業
未揚奉先臣之清白飲下士之編章數辱公車一對明光乃荷
丹毫遂縮銀黃俾汝救民唐魏之疆假還不日待罪方將星言
首塗吉日辰良神尚相予龔行四方思敬楫於大川敢騁轡於
康莊守道守官民幾民康夫惟捧檄重眷維桑故山鬻鬻宰樹
行行昔宋相籌邊屢吟想於圭峯月下人龍開濟亦倦焉於歸
臥南陽蓋馳驅可以許而父母之邦良用不忘也於戲肅肅
王命悠悠天常日月照臨臣敢懷鄉尚饗

王命使然下常日只照湖田湖澤兩兩

烟雨湖蓋報應何以指西又排之其身用不忠也無類蘇蘇

野山若處山善靈風也懸筑圭峯且不人謂開濟亦對百外

雲霧皆遊平百另發只東夫對無湖重谷舞桑坊山懸

昔年山且以自向湖山守與百四八男於湖山大山運

丹沙雲霞紫雲紫雲紫雲紫雲紫雲紫雲紫雲紫雲紫雲

未似奉武引之湖向湖平土之雲

湖盡雨雨風氣之清好祭外

湖回湖生湖會又和湖會湖

舞直歌二十六筆然知是酒

之宮山西風

祭毘旗岡后土文

維咸豐七年歲次丁巳正月甲寅朔越十四日丁卯原任山西知縣厯署孝義襄陵縣事朱某等謹以柔毛剛鬣清酌庶羞之奠敬祭於毘旗岡朱山后土之神曰嗚呼我房祖永歸於此緜曖幾何年矣侮予之逼神實禡之謀野之獲神實啟之升靈妥魄神則祉之敢不有薦也尚饗

一
 二
 三
 四
 五
 六
 七
 八
 九
 十
 十一
 十二
 十三
 十四
 十五
 十六
 十七
 十八
 十九
 二十
 二十一
 二十二
 二十三
 二十四
 二十五
 二十六
 二十七
 二十八
 二十九
 三十
 三十一
 三十二
 三十三
 三十四
 三十五
 三十六
 三十七
 三十八
 三十九
 四十
 四十一
 四十二
 四十三
 四十四
 四十五
 四十六
 四十七
 四十八
 四十九
 五十
 五十一
 五十二
 五十三
 五十四
 五十五
 五十六
 五十七
 五十八
 五十九
 六十
 六十一
 六十二
 六十三
 六十四
 六十五
 六十六
 六十七
 六十八
 六十九
 七十
 七十一
 七十二
 七十三
 七十四
 七十五
 七十六
 七十七
 七十八
 七十九
 八十
 八十一
 八十二
 八十三
 八十四
 八十五
 八十六
 八十七
 八十八
 八十九
 九十
 九十一
 九十二
 九十三
 九十四
 九十五
 九十六
 九十七
 九十八
 九十九
 一百

一
 二
 三
 四
 五
 六
 七
 八
 九
 十
 十一
 十二
 十三
 十四
 十五
 十六
 十七
 十八
 十九
 二十
 二十一
 二十二
 二十三
 二十四
 二十五
 二十六
 二十七
 二十八
 二十九
 三十
 三十一
 三十二
 三十三
 三十四
 三十五
 三十六
 三十七
 三十八
 三十九
 四十
 四十一
 四十二
 四十三
 四十四
 四十五
 四十六
 四十七
 四十八
 四十九
 五十
 五十一
 五十二
 五十三
 五十四
 五十五
 五十六
 五十七
 五十八
 五十九
 六十
 六十一
 六十二
 六十三
 六十四
 六十五
 六十六
 六十七
 六十八
 六十九
 七十
 七十一
 七十二
 七十三
 七十四
 七十五
 七十六
 七十七
 七十八
 七十九
 八十
 八十一
 八十二
 八十三
 八十四
 八十五
 八十六
 八十七
 八十八
 八十九
 九十
 九十一
 九十二
 九十三
 九十四
 九十五
 九十六
 九十七
 九十八
 九十九
 一百

卷九

祭房祖白岳先生文

維咸豐七年歲次丁巳正月甲寅朔越十四日丁卯朱氏孔安
房諸孫某等謹以柔毛剛鬣清酒庶羞之奠敬祭於房祖有明
高士白岳先生之靈曰嗚呼先生德芬雪白蘭薰先生翰墨金
石不蝕先生之存蘭錡蒲輪先生之去雲霄一羽謂宜慶餘猶
有鬼神何悟忽諸乃痛斯人崇名兩閒遺瘞七尺相望百年三
披荆棘眇眇末孫躋壠而號簪烏不歸涕泗增勞昔孟軻氏墓
出宋元豐甯顯甯晦從汙從隆雖聖與賢無如命何時數有奇
於人則那嗚呼富貴何常以不亡亡大矣夫子與造化亢嗚呼
天之所奇我之所大下馬一陵斯萬千載尚饗

朱九江先生集卷九終

再傳弟子校桀於讀書草堂

朱九江先生集卷十

附錄

平河均修水利之碑銘

誥授資政大夫前兵部侍郎兼都察院右副都御史巡撫陝西等處地方提督軍務兼理糧餉平定陳士枚撰

文

賜進士出身平陽府儒學教授忻州董宇偉書丹

漢應劭謂平陽以地居平水之陽得名平水發源郡西二十里平山卽禹貢之壺口山莊周書之姑射山水經注以爲水出壺口東逕狐谷亭又東逕平陽城東入於汾是也源初出若蠶房數武遂澎湃如蛟宮歎薄爲金龍池池上爲龍祠祠西南又數

泉皆入平水水東二百步爲清音亭拱清音亭前爲雲津橋而平水分流所謂十二官河以灌臨汾襄陵之田者也田以水滋民遂以水擾據上流者專其利地未漑而漑之月率三四舉晝浸而夜潤人佚而財阜播種常及其時稼有餘沃豐茂碩好民以富囂在下游者渴其利時旱曠而水不下歲不過一再漑春蒔而夏亢人勞而財匱播種不及其時禾以槁死秕敗穉凍民用儉札坐是爭利而聚鬥者百千人死傷縲絏大獄數起厯院司觀察府之大尹臨襄二縣之大夫或竟其獄止於罪人斯得或厭其焚糺不可究詰姑顛預了之河渠遂不幸歲歲有事噫嘻豈民之多辟痺俗終不可變邪或者經畫區處之道猶有所未盡也咸豐元年復有尹紹仁京控武舉劉廷元事 詔以歸

行省省以下郡邑明年七月廣南朱公來攝襄陵縣廉獄事獄成抵罪若干人貫釋若干人惟明克允輿人翕服公乃喟然歎曰嗟乎蠢茲蚩蚩利餌之於前而刑糾之於後雖曰不罔民誰欺哉乃博詢訟端則謂有豪強行霸者龍斷居奇者有水無地有地無水者有地無水者向無買水券地弗予之水有水無地者向有買水券雖無地得以市利焉公曰強譎害良治之而已若夫地者糧所自出水者地所滋生糧與地不能判而爲兩地與水能離而爲二乎於是定以地隨糧以水隨地之制又會臨汾周侯親履畝兩邑田若稅相直也於是定平水爲四十分縣各取其半復於境內設四綱維持之曰水則曰用人曰行水曰陡門其水則之法縣水二十分八支渠分灌視壤廣狹爲差南

橫渠六南磨渠四高石渠二分有半李郭渠二晉掌渠分有半
東靳廟後兩小渠各半分而畎澮均矣其用人之法渠有渠長
司水之禁令溝頭治澆灌堰長守陡門皆聽於渠長違約者渠
長驗其多寬之數督溝頭行罰不受罰者有刑誣者坐如律而
主伯立矣其行水之法晝夜有程通閉有節傳牌有部次淘河
有式動碾有候而制防密矣其陡門之法築門筦渠渠上廣七
尺下廣三尺門廣一尺其夾深尺二寸槌以石毋勿平牖以版
毋弗密鑿以印記稽以守訶毋弗愆且壹而羸縮謹矣議既定
徧上於院司觀察大尹皆報可功裒役征奉令貫行自時厥後
狐廚汾曲之間不圩而秔稻茂不雨而麻麥熟墟落綿繹風煙
浩渺江天湖景如墮目前且也經界旣正洽比亦興閭左始知

相生相養之樂而風俗又一變矣經始於公下車之月受成於公受代之前一月實得水田三萬四百畝有奇里紳王宇等用來乞文余惟天地之道聚精於高歸物於下表爲山河以戒其域疏爲川澤以導其氣區爲陂塘溝洫以鍾其美今夫河水之歸也渠川之分也田民之依而財之藪也是故民非田不瞻田非水不穫神之粢盛於是乎供人之蕃庶於是乎殖國用於是乎悖裕民氣於是乎綢繆完固而不可動搖凡以水無散泄壅遏田各有所資也唐時王官谷瀑下流爲貽溪司空表聖立法示谷人以時用之至於今不廢異時李太守義方亦作永利池堅明約束分給趙城洪洞民茲皆河東故事惜講求者少耳今公不鄙夷其民如爲子女析纍澤周意厚來而僦功訖工遂去

天時人事良非偶然民之躋登茲者庸非其慶也邪公以大儒師表當代其爲令吾晉也晉中修學好古之士爭從之到官多異績名傾一時繫囚趙三不稜劇盜也護縣薛經歷介卸篆輒挈命犯王申保吉年娃越獄跳去薛憂懣須公至以相屬公謝病三日不至益急不知所爲趙三不稜黨眾亦意尹且病未卽視事弗戒也然公蚤出重貲購知其所欲適亟假郡捕前半夕疾馳百二十里至曲沃郭南以俟趙三不稜羣就酒家胡未卒飲役前持之奮刃格拒顛數人墜地忽樓上下百炬齊明則赫然襄陵縣鐙也迺伏地就縛比邑人迎新尹尹已尺組繫原盜入矣遠近以爲神河東歲患狼俗愚言神物不可擊擊且尋報復席氏女將出閨爲所嚙又兩造訟噬其一讞以不成公大憤

惋募野虞獵戶捕之得者予錢萬猶無獲迺親檄禱西山神祠
所謂雙靈龍澍者也約十日驅狼盡否則仆神瀆其廟人戶震
喘捕益亟時嚴秋氣寒風日蕭肅天忽大雩霧旬日人得跡獸
所出沒攢火鎗擊之無脫者半月得狼百有七患遂絕橫汾霜
降後則輿梁成士女落之歌舞彌口潦復大至濤瀧洶湧勢將
漂沒公遽出禱之應時衰落平陽總兵某至暴抗也挾軍興勢
以八百里台符行縣調吉州兵公拒不受曰襄陵至吉州二百
三十里亂峯際天澗岡竄窳夏有谿谷之漲冬有冰凌之阻僇
佼壯夫解鞆扳緣上下然且月有斃踣以故境獨不置驛營有
急法當發塘兵不得行縣鋪曷以八百里台符爲某忿牒大府
大府督過謂且干嚴劾公奮然曰方今南方糜爛於盜又使北

方騷擾於兵是天下無完民也民不堪擾且習知南方事幾日而不爲亂亂起非令誰任其咎等劾也令甯誤軍興不敢激民變大府無以難他日與總兵旅見於郡總兵反揖之曰明府利害公正容曰某何敢特不知利害耳關氏錯居河東郡邑皆壯繆侯裔解州世襲翰林院博士某數以訟脅族人財至襄陵以干公公牘門當弊獄關神廟許百姓聚觀旦日闖廟闔會者數千人立階下日隅中公衮服人以博士及其族上升堂再拜抗聲祝曰侯以義烈成神明千百世後述侯事者足羞鄙夫之顏其義烈然也今世遠無以庇賴其子孫勢當以屬令令涼德不能化誨使有門內之獄以爲神明羞皆令之罪也某皇恐求罷訟公責之曰若祖異姓如骨肉若迺同室操戈矛若祖不以金

帛易恩誼若於門內索金帛且若系則世襲也官則翰林也敗
官不忠忝世不孝不忠與孝賄雖積人將不食汝餘吾不難詳
褫汝擇賢繼侯世顧臯狀出且辱州里輕朝廷辭氣慷慨聲淚
俱下於是階下羣唾曰汝誣其祖而欺其族又以勤我公何以
爲人矣某媿欲死兩手自搏叩額無算口喃喃自詛詈及出觀
者一時迴首不忍睇其面由是邑無親屬訟者公無事卽出行
縣騶從不設老蒼頭控蹇衛一吏囊筆札一伍伯負糗糒自隨
而已所至拊循媁媁老稚暱近如家人迎路獻茗菴瓜果有遮
訴者索木机坐道與決判牘以某甲喚某乙無敢不至詰慰曲
直能引伏則已恆終日不答一人曰細故毋傷夙好也其餘頒
讀書日程以勸學勅保甲新令以督姦追社倉粟二萬石以備

灾禁火葬罪同姓之昏以正俗更不可枚舉邑故晉腴壤時諺
有金襄陵之稱後稍凋劫有司猶取盈無饜告幫稱壽率輦千
百金公一切禁絕廚無特殺廳事無夜火日市蔬圃菜數束肉
一片共幕師而已澹泊質素寢已化俗優人百戲至徙之佗邑
其風操如此蓋公於作宦通塞肥瘠是非誦譽當世所講求探
刺者諸不解校智營神運行臥坐起酬對手口所指述夢寐所
縈繞皆在小民便宜疾苦欲一一自我行去之民亦相率喻其
誠駁一詞下一教藜寫而聚觀朝令而夕徧野夫臧獲能道之
市井或傳會爲美談於其去也若奪嬰兒於慈母之懷而禁其
牽索也者聞信也而驚及期也而憂儒生乞畫像氓庶留鞞鐙
頌愛述德投文字繖蓋之屬纍纍空積雖慰遣之不能止也出

署之夕農輟其耒市空其肆扳留萬人遮馬首不得前及城門
門爲之陲渡汾橋橋爲之折父老持觴榼伏餞頂蹠相舐人語
鼓吹聲相亂里婦村媵亦縳小兒匍匐跪道不遠而至句公摩
兒頂曰耶試拊之好育養也距郡三十里蓋兩晝夜乃得達當
陲橋時郡邑弟子襴衫博帶百十人掖輦而過公遜讓諸生謂
籃輿固弟子職弗舍也邑人旣不獲留公公去遂祀之於鄧伯
道祠春秋報祭弗絕烏虓公在任僅百九十日宜民之效遺愛
之深至於如此盛矣哉近世以來未嘗有也余旣心重公尤喜
公利民能爲經久遠得古昔叔敖灌雩婁國僑正封洫遺意信
乎儒者之政異乎俗吏之爲之也爰詮次顛末其詳具於碑陰
餘事埒見一二又永言以銘之俾百代下讀者咸知敬仰公世

世無變其遺法公名次琦字稚圭丁未進士廣東南海人晉士
所稱後朱夫子也銘曰

業業壺山煙雲洩蓄溢爲靈源膏吾井牧高印汗邪可稻可麻
一漑之饒穰穰滿家旱魃爲厲燎原赫熾是褻是穢此焉豐歲
飢鴻嗷嗷流捐憂勞以飽以飫此焉樂郊孰民與利長瀾盛沸
胡不均宏沾施大惠堙我石田踞爾沃洲不占勿幕乃刺相矛
幾世創夷幾人岸獄擾擾觸蠻茫茫慘黷天哀我民降此惠君
緊惟惠君百里之仁惠君之來讓其耆皓作此不祥以速汝天
惠君之來荒度降升雨沐風纏纒趨楯行 國有租庸地有徑
術計租定地阪險原隰量地分泉日時杪忽仿古遂人顛若畫
一民曰愉哉迷始悟今鹿食呼羣雅取萃苓鳴鳩均養詩美桑

林曾是謹嘒化爲謳吟邑居廉讓戶講鄒魯設尊康衢恢宅涪
宇社配樂公人呼召父君政之成南風在絃君名之光北斗在
天陂稱僕射湖號郎官我懷惠君胡斯萬年

咸豐三年歲次癸丑六月甲戌朔廿六日己亥建

稚圭先生畫像記

嗚呼賢者所係於人國顧不重哉用其人足以圖治用其言亦足以禦亂若有人不用有言不信則淪胥顛覆之禍捷發於眉睫之間不可振救迨生民糜爛患中國家斯世乃嘖嘖於大賢知幾之早潔身之遠而太息痛恨於當軸之人謂夫徒薪來告明明有此彼昏不知竟憤憤以至斯也嗚呼此何及也哉君子之仕也非以私市也東坡蘇氏所謂苟可尊主庇民則忘身爲之是也君子之有言非以銜異也亭林顧氏所謂以明道救世者是也然則君子無救世之柄乃不得已而有言至於言亦不售君子始無望矣昔王通以太平十二策干隋文不用遂賦詩東歸教授龍門帝猶謂恨遇生晚一再徵之竟不起陳亮上中

興書時方諱言兵僅授館職亮慨然曰吾爲國家數百年治亂豈爲一官卒不受是故用其人以戡難者古有之矣陽明平宸濠是也用其言以決幾者古有之矣昌黎策淮西是也人與言均失而亂亡侵辱不旋踵者古有之矣王仲淹之於隋陳同甫之於宋是也吾師稚圭先生以道德學術高天下合襄陵煦民若子女民亦愛之如爹訓諸生督誨諄諄可畏而親或雜以詼嘲游燕使皆醉義忘歸比去士女持扶挽留號咷數十里不得則乞畫像以祀諸生又刻石於縣學之敬一亭當是時部民雖不忍公平固謂公旣仕晉去當復來否則大其施亦將及我不謂先生竟拂輿歸也先是南方盜起先生猶在襄陵王子冬寇東下厯破武昌安慶金陵北至揚州氛雖遠先生卹然憂之謂

宜綢繆全晉聯絡關隴爲保障一方計大約謂雍冀爲天地積
高之府勢踞建瓴與爲合從則我免腹背之敵關隴得唇齒之
依况晉中富實甲海內內而馬牧金鐵硝磺芻粟之產饒給於
軍實外而蒙古察哈爾之兵踊躍於徵需長安稱陸海豪戶亞
晉中而河西之武力關外之防秋皆足備緩急也一旦有警甘
督出商漢陝撫據潼關與吾爲犄角吾撫軍則率北鎮勁旅拒
河爲固踞茅津太陽之間仍命廉使率南鎮控太行以防河北
其餘若遼州之十八盤平定之井陘口五壺之黑山龍泉等關
可丸泥封也北邊幸無事將軍引綏遠旗兵入鎮會垣與藩侯
居守副都統移駐大同以鎖鑰北門我師之出平蒲爲正澤潞
爲奇正扼其亢奇扼其背以守則固以征則彊是故漢南有賊

甘督爲主秦晉赴之河北有賊我師爲主關隴赴之豫中有賊
我與甘軍之赴陝撫者亦如之堅瑕一氣折衝千里此常山蛇
勢也於以鞭箠楚蜀控引河洛援中原以屏蔽京師蓋桓文之
勳也其條目又有止徵調請便宜嚴賞戮作忠義右軍謀選鋒
銳講拊循禁科派保殷富息流移諸政乃爲三難五易十可守
八可征之策洋洋萬言以府主全州何公撫軍所信也再三言
之何不能用癸丑三月代還乃自奏記如所以告何公者加迫
切焉不省先生遂引疾無何揚州賊由鳳亳趣豫跨河撲懷慶
八月折而西入晉境逕陷垣曲絳縣曲沃進屠平陽府又殘洪
洞潞城黎城以出喋血千里蹂躪及畿輔

天子遂以輦轂爲憂謀臧不從其禍蓋至於此先生之學平實

敦大不涉叢碎亦不爲性命高談居家則孝友居官則惠慈以
及物爲功以忘己爲大以無欲爲至器量閎邃渾渾然喜怒不
形當辭受取與去就之交則介然有執處眾中尤簡重及夫談
經世大略則援證今古會文切理鴻鬯疏析聽者心目爲開璫
嘗妄測先生謂行古道而不固用儒術而不疏高峻似河汾而
篤實過之豪邁似永嘉而深穩過之需次七年不形缺缺一語
不合投劾遂歸樂則行之憂則違之先生信侗乎遠已璫等不
獲終從先生遊道梗負笈未可必佗日者登首陽上太行躡孔
子迴車之蹟以望南天見有雲氣歔蒸若散若連若往若還終
不離膚寸之間者是我先生蝸寄之廬蟠龍之淵也哉咸豐三
年陽月門人太原王璫記

朱子大全卷十

朱子大全卷十

朱子大全卷十

朱子大全卷十

朱子大全卷十

朱子大全卷十

朱子大全卷十

朱子大全卷十

朱子大全卷十

朱子大全卷十

朱子大全卷十

愛棠錄

謹案愛棠錄八卷晉人美先生也鄭箋云召伯聽訟不重
煩勞百姓止舍小棠之下而聽斷焉國人被其德說其化
思其人敬其樹先生宰襄陵百九十日閒行縣日多雖雖
虐經術之用甘棠芟說之風也觀其所錄不惟襄陵人思
之晉人皆思之矣今以所錄事見水利碑者省之附其碑
未及或視碑較詳者詩歌之尤者俾百世下攷諸集末焉

教諭宋時憲紀邑侯朱公禱雨而雨詩云佗邦甚旱繼以雹此

獨和甘弭災患農毗泥首吏士歡我侯忠孝神明貫馨香治績

配先公盛事兩朝光簡翰

侯八世從祖諱讓明萬厯中守夔州
治行稱最大旱禱雨應時下時呼爲

朱水事見
四川通志

拔貢翟良璧美朱令君詩云使君紫陽裔名過朱伯厚不為豪

帥奪

太原鎮帥某驕橫甚乃至不受巡撫節制軍興擾驛站公獨持法裁抑之氣出其上謂將與辨於闕下甯舍一官謝

百姓帥媿屈州郡賴

甯受辱金誘

向宰襄者祝壽告幫俱歲再舉舉則醵入千百金公悉禁

止倡辦者以贓論又故事新進弟子員贄縣庭各廿有四金稿從四金蓋以助棚規也公謂士寒峻為多概予蠲免今歲充文

武生員五十二名計免千四百餘金且好生以為殺殺者乃自著為例刻石學門尤令士林稽首至地

咎

公治獄尤仁恕鞠尹紹仁京控一案活百四十七人保全數百家趙曲結拜一案亦活數十人餘獄多因平反得生者殺

人囚劉長輻公至乃引伏將出死流涕謂化俗中牟令富民南觀者曰死自吾分恨爺來遲吾致陷此也

陽守異蹟以流傳為神明父母

公神奇之蹟不可勝舉最異者退汾流驅猛獸河東雨雹傷稼

而邑境獨大有年縣幾無訟而鄰封赴愬者相屬道路又每讞疑獄旬月間即流聞郡國優伶輒集為戲劇如包龍圖况太守

事故

平陽教授忻州董宇偉送襄陵朱使君詩云閉戶屢合轍刻舟

陋拘墟古錢不適用安用爭錙銖可言卽可行懷哉古通儒
拔貢劉侃送朱令君詩云滔滔江河下仰望黃鵠舉吁嗟聖道
南海濱有鄒魯

前任宗學教習翟良琛送朱使君詩云廉鯁從來有如公得未
曾威生銅面具清抱玉壺冰饕餮羣皆伏貔貅氣不矜秋高華
峯隼嶄絕見眉棱又云省訟傳呼少觀民燕處稀印牀花自落
行幘雉還飛衙苦青衣散官劬赤子肥如何虞芮質越境至如
歸其卒章云泉林高臥久物色到袁安疾苦詢民隱文章接古
歡計難參馬服貧不累豬肝淚盡酬知己吾生老伐檀
廩生陳邦傑送朱令君詩云直以性情孚岸獄更無關節到文
章又云閉關人物殷勤訪講院文章子細論

生員方鎮送邑令朱稚圭先生詩云一事感孚真最捷平生不

近四知金

蔣錫慶送朱令君詩云勿遺利於地勿壅利於人矧狐谷之壤

十萬八千畝原隰龍鱗

謹案水利碑稱實得水田三萬四百畝有奇據此詩則水

田實數尤鉅

咸豐三年十月中議大夫內閣侍讀學士陽曲郭景僖襄陵

舊令朱使君祠詩序言使君既去官縣人禋祀之不衰僕過平

陽訪君遺躅父老皆流涕感而敘之詩云虎觀遺鴻筆雄疆借

繭絲艱難才不世中外理無私廟寫生金像名甄陘石碑有恩

酬俎豆無計返旌旗昔者程明道伊今陸隴其何當後車載璜

王起熊影

闔邑紳士公獻聯句云在所損乎在所益乎三思而後行必以告新令尹非其義也非其道也一介不以取此之謂大丈夫
鄧庄村紳民公獻聯句跋云邑尊老父師甫下車卽脩建鄧公伯道祠墓以興教化紳等感激無地謹達下情

祭朱子襄先生文

維光緒八年正月某日兩廣總督張樹聲廣東巡撫裕寬謹以
清酌庶羞之奠致祭於子襄先生之靈曰大道堊鬱士失其馳
羣囂眾歛以儒爲些疇經不韋疇立不隨天地之紀匪善焉歸
惟君嶽嶽起自南海睇古思齊聖豈余詒昔尹襄陵人稱惠君
撥煩蠲苛剗駁還純平水瀾瀾以漑以蕃桀黠擅利釁生不均
下車覩土爰定水則置門管渠謹稽闔闢主伯羣僖芘芘黍稷
始君未至固盜潛跳猝揜其逋若鬲圉牢君之在官洗手奉職
目營心注民依是恤有不便民忼慨矢辭令實強項气撓健兒
祭水弭害誓神驅狼一誠所孚疵癘消藏弊獄闕廟發言琅琅
觀者如堵萬皆盡裂彼不孝子搏頰出血風動化流民用大鱗

俾農服田土興絃歌時巡郊野笑語姁姁或質所爭就壠理論
百九十日政成而去攀遮塞涂如嬰失哺億眾尸祝豐碑仡樹
盜駭中原債不可羈君感時艱上言便宜師截其來可踣於屣
當路泄泄君乃拂衣比寇入晉果如君畫惜哉斯人鴻冥其翼
居恆誦法繫程與朱務踐厥實悉吐其餘學者景從不肖畏義
相率以善莫知所自吾曹薄德來忝大邦不有仁賢其曷以臧
峩峩高山皎皎空谷方資清尚用敦末俗何寤邇者剝運斯丁
胡天不弔賈我老成君之經綸芻魄四徹其施於世不及十一
君之學術粹然巨儒明不自翹遺書有無磊磊中懷儻俾大襟
唐虞三代豈不如昨抑其所爲夫既有然於君奚嫌無忤前賢
獨是吾曹欲咨無所蒸黎莫歸士夫喪巨歔歔瞻望雪涕難收

豈伊其私邦國之由含哀泚筆言告九幽嗚呼哀哉尚饗

禮山紀聞

簡朝亮曰朱先生年譜蓋書其大者也譜成雜記其餘君子之章彪彪作續瓠葉可歌雖微不廢作禮山紀聞

凡二十有二條

先生六歲族伯雲中過塾示先生屬對曰老子龍鍾先生率應曰大人虎變

有以賓館請者先生以其紈袴家也辭之徐佩韋大令就之中歲而辭之君子謂大令知誼先生知幾

有姍黨登科來謁坐而言曰予幸登科假佗國學生名也溢予若干歲矣先生心賤之笑曰斯不獨必得其名抑且必得其壽先生曰科名不足以重人當自樹立則人重科名爾

先生嘗謂故人曰何錢癖也故人曰予之癖愛錢猶子之癖不

愛錢也先生笑曰子何以答錢神故人迺爲集句曰我生託子以爲命天下何人不識君

同鄉岑亡友之子幼孤先生卹之友子長遊越南贏金還鄉饋先生夥先生納茶數掬皆反其餘

先生赴試廣州渡白鷺潭中流疾風發舟將覆檣顛先生坐白若也方持茗飲無微傾者

先生曰古云精神福澤之源幼安省譽三朝晏起昔里甫先生見晏起者每警之云在牀曰尸何不祥也

先生方壯有交游喜詼諧自矜得女弟子先生正言曰西河簡齋老子婆娑皤然白髮女弟子從之游至今猶譏於莊士况少年者邪其人謝之迺曰寓言云爾顧愛我之忠孰有如足下者

虜

先生居都門邑館同人譚紀文達筆記曰鐵蟾之疾見一采毬大如車輪中有麗女遂瘵而亡文達以謂鐵蟾愛奇鬱爲心疾不其然邪先生曰非也北史徐謩傳云武成帝酒色過度病發自云初見空中有五色物稍近變一美人食頃變爲觀世音徐之才云此色欲虛勞所致處方服之頓愈然則鐵蟾之疾近女之過非以愛奇也

道光二十有一年秋先生會試南歸同年何孝廉以昔年殉於舟次殯樁南安及是其弟度嶺迎喪牙人索而困之將徒手歸矣先生至飲贈傾貲且言於郭照磨遣役護行千里喪歸先生會試南歸次臨城驛雨後嚴寒覆車數四人馬陷泥淖中

更殘饑踣從者潛逃輿夫扶羸不起迺大哭先生整衣立路孺
徐語同人曰我輩苟佗日見用可放膽作好官去脫有萬一遷
謫苦況不過爾耳此一夕固試劍厓鍊金石也

先生西入晉至井陘關謁漢壽亭侯席自誓於神曰某若不追
吳隱之包孝肅諸人有載晉一錢歸者明神殛之及南歸如所
誓

襄陵席氏之女將登迓車而狼噬焉先是先生布令曰狼殺人
人猶不殺狼虜然邑人無敢動者朔日先生及邑廣文祭廟旣
畢廣文戲謂先生曰女也席氏未遇才郎先遇豺狼奈何先生
於是殺狼之心尤摯矣

先生居晉中丞屬聽事楹書先生題曰聖代卽今多雨露諸君

何以答昇平粵人林大令宦晉以事部遞先生贈曰更爲後會
知何地各有前因莫羨人先生南歸晉人請留別先生賦曰且
欲近尋彭澤宰不妨長作嶺南人皆集句也

歐陽小韓孝廉赴澄邁儒官與一妻一妾偕涂遇先生立而言
先生曰詩云無小無大從公于邁孝廉大笑

試榜錄成有鄉老走鬻於鄉鬻已道過禮山或入見焉先生與
之坐或語刺刺也門人異之己而野僧叢弊鄉人不知也先生
發之繇鄉老也鄉老游食蠶而多聞

鄉人關凌雲弄煙江疊嶂圖跋曰告我後人永弄斯圖雖千金
不易也亡何子孫鬻之三易至先生迺眠其跋歎而藏之卒訪
其子孫之賢者還之不收其直

朱九江先生集
鄰鄉龍江劉方伯士奇在有明時美治行拜賜璽書其書文待
詔徵明爲之也有重賈鬻於先生者或求轉鬻先生靳焉私謂
人曰吾獲之將還之他人未必然也於後劉氏子孫有從學者
遂還之問所直終不言餽薄不受

同治十有二年秋有流星其光如晝斯須有聲或以問先生不
答已而詰曰子曾讀漢書虜問者曰未也踰年國卹問者驚
悟檢漢書然後歎天文志之符也

先生飯蔬食闔人日汰其糝有過先生者精食而客之客嘗至
先生以其舊游七十年也主客相忘加饌仍蔬食故人食不下
咽謂曰何自苦如是虜先生曰吾以礪其齒也

朱氏祖祠先生題其額擘窠大書或問之曰灑歐虞閒也又題

其東廂曰頌先人之清芬

附錄

補禮山論事一首

豈謂周書闕詩從句首安舉空羣市骨朝退獨忠肝李報齊侯
好相求漢宰官夷吾天下計首計戎馬虜汝日中觀辛受碑陰

白鄒訪道士丹七方通在六排律見三端

朱九江先生集卷十終

再傳弟子校栞於讀書身堂